

Petrus kaduan Petrus susula kaduan

Soda-molek

¹ Susulak ia neme au, Simon Petrus mai.* Au dadik Yesus Karistus hataholi nadedenun. Au dadik Ndia nadedenun, fo Ana haitua au uni sudi bee uu, fo afada hataholi la'eneu Ndia.

Au sulak susulak ia fee ei, fo kamahelek neu Yesus Karistus so. Huu Manetualain dalen ndoos, de Ana soi dalak, fo suek ei boe oo, bisa mamahele neu Karistus, sama leo ai. Namahehelek ndia belin ana seli, soaneu ita basa nggata. Karistus boe, dadik neu ita Manetualain, ma Ndia boe oo, dadik Hataholi mana fee sodak neu ita neme ita sala-singgo nala mai.

² Au oke fo ei bisa malelak neulalau Manetualain, ma malelak neulalau ita Lamatuan Yesus. Suek Ala latudu Sila dale malole nala neu ei, fo ei bisa masoda mia sodak, mole ma ndoo-ndoo.

Lamatuak hele nala Ndia hataholi nala, basa de noke nala sala, fo leni Ndia leu

³ Yesus naena koasa sama leo Manetualain koasan. Huu ndia de, Yesus fee ita basa nggata hata fo ita paluun, suek tasoda ndoos tungga Lamatuak hihii-nanaun. Ana tao leondiak, huu ita talelak neulalau Ndia. Ma Ndia ndia noke

* **1:1** Susula dede'a Yunani luma sulak, “Simon Petrus”. Luma bali, sulak “Simeon Petrus”. Dede'a de'ek *Simeon* ndia, neme dede'a Ibrani mai. Ndia dede'a Yunanin, na ndia Simon. De, basa hataholi malela kala lae, Simon Petrus ma Simeon Petrus ndia, na ndia hataholi bei sama.

nala ita, fo dadik teu Ndia hataholin, huu Ndia dale malolen ana seli ma Ndia koasan inahuuk.
⁴ Yesus fee basa dede'a kasosoak neu ita so. Huu makahulun, Ana helu so, fo sangga fee basa dede'a kala sila. Ndia hehelu nala, neulau hiak. Ana fee basa sila leu ita, fo suek ita dale nala bisa dadik sama leo Lamatuak dalen. Ma ita boe oo, bisa takambo'ik teme basa dede'a kabook fo hataholi lahiik tao lai daebafok ia, huu kada sila tao tungga sila hihii heheli nala, ma tala nau lakatataak.

⁵ Huu ndia de, au nau ei mbalak eik, fo tao dede'a malole.

Huu, ei mamahale neu Yesus so, tehoo ndia bei ta dai.

Tao dede'a malole nakandoo.

Malelak neulalau Lamatuak, lena bali.

⁶ Tehoo, boso losa kada ndia leo.

Manoli fo ei masoda makatataka aok.

Tehoo, ndia bei ta dai boe.

La'i-la'ik ei hambu toto'ak, na, ei musi mahele teas, fo boso heok.

Tehoo, tao lena heni ndia bali.

Tao basa-basan tungga Lamatuak hihii-nanaun.

⁷ Tehoo, boso losa kada ndia leo.

Matudu susuek neu ita tolanoo kamahele nala.

Tehoo, ndia bei ta dai.

Huu, ei musi masoda masueao makandoo.

⁸ Mete ma ei masoda leondiak, ma dede'a malole la ia boe tamba lakandoo, na, ndia tao nala ei boe malelak malolen lena, mia ita Lamatuan Yesus Karistus. Dede'a malole la ia, kasosoak ma taa ngganggali heni fai. Huu dede'a malole la ia, tao lala ei bubuluk malolen seli

la'eneu Ndia. ⁹ Mete ma hambu hataholi taa nau tao leondiak, na, kada ana dudu'a keke'uk. Tana nita hata manai matan, de sama leo ndia ndia, mbokek. Huu, Lamatuak koka heni hataholi sila sala nala, de dale nala bisa lalalao. Tehuu hataholi ndia lilii henin so!

¹⁰ Tolanoo susue nggalei! Hatematak ia, ei musi mbalak eik fo boe matea bali. Lamatuak hele nala ei so, fo dadik Ndia hataholin, boe ma ei mini Ndia miu. Hatematak ia, ei musi matudu, mae, ei maso dadik Ndia bobonggin so. Mete ma dede'a kala ia fo au so'u kasa isinaak ndia, boe tamba nakandoo nai ei soda mala, na, neu ko ei taa tuda. ¹¹ Manetualain sangga fee ei dede'a inahuuk esa, fo ndia Ana soi dalak ma fee ei hak, fo simbok Yesus dadik neu ei Manem, suek masoda makandondoo henin mia Ndia. Huu Ndia ndia, ita Lamatuan. Ma Ndia boe oo, Hataholi mana fee sodak neu ita, teme ita sala-singgo nala mai.

Hatina de Petrus sulak leondiak?

¹² Ei bubuluk dede'a kala sila, fo au so'uk isinaak ndia, ma ei mahele teas, huu ei mamahele hata fo ndoos. Mae leondiak, tehoo au nau asanenedak dede'ak ia neu ei taa-taa, fo suek ei boso lilii henin. ¹³ Au taa nau ei lilii henin. Au nau asanenedak ei, fo ei dudu'a makandondoo henin dede'a kala ia. Huu ledoeik au bei asoda nai daebafok ia, memak nandaa mete ma au asanenedak ei dede'a kala ia. ¹⁴ Taa dook, te au mate so. Ita Lamatuan Yesus Karistus nafada au leondiak so. Huu ndia de, au bubuluk memak so. ¹⁵ Mae dei fo au mate so, tehoo hatematak ia au mbalak eik, suek ei masaneda makandoo dede'a kala ia.

Ita tita Yesus mandela-masa'an so

¹⁶ Makahulun, au ua au nonoo nggala tui ei so, la'eneu ita Lamatuan Yesus Karistus. Ai boe oo, tui mae, dei fo mete ma Ana fali main, na, Ana mai no koasa inahuuk. Tetebes, hetu? Tutui taa nakadudulak ndia. Huu kada ai tui ei la'eneu hata fo ai mita mitak no ai mata de'e heheli nala! Huu ndia de, ai bubuluk Yesus koasan ndia, sama leo mane inahuuk esa. ¹⁷⁻¹⁸ La'i esa, ai sama-sama mia Yesus mima Lamatuak lete malalaon. Boe ma Amak Manetualain mesa kana nafada la'eneu Yesus mandela-masa'an. Huu faik ndia, ai mamanene hala malole esa kalua neme lalai mai, nae,

“Ndia ia, Au Ana susueng.

Ana tao namahoko Au daleng.”☆

¹⁹ Dede'a kala sila tao nala ita tamahela tetebes lena dede'a kala fo ita simbon teme Lamatuak mana kokola makahulun ele so. De, malolenak ei tao tungga sila hehelu nala! Huu sila hehelu nala, sama leo bandu mana mbilak esa nai mamana makiuk. De, ei musi mamanene neu sila hehelu nala, losa Yesus fali main. No leondiak, ei bisa boe bubuluk no manggaledok. Huu, ndia sama leo ei mita nduu ina lolembilak, boe ma bei fo ledosadu, tao manggaledo basabasan.

²⁰ Masanenedak, huu Lamatuak mana kokola nala lafada memak so, la'eneu dede'ak no'uk. Tehuu sila hehelu nala, taa tungga sila hihii

☆ **1:17-18** Mateos 17:1-5; Markus 9:2-7; Lukas 9:28-35

heheli nala.† ²¹ Huu hata fo ala sula kana ndia, taa naoka neme kada sila lahiik kokolak. Tehuu ndia naoka nai Manetualain, tungga hata fo Ndia Dula Dale Malalaon natudu neu sala.

2

Hataholi mana manoli pepeko kala

¹ Makahulun, hataholi Israel luma lae, ala dadik Manetualain mana kokola nala. Naa te ala pepeko ndia. Dei fo ei boe oo, matonggo mia hataholi leo sila kala, lai ei lalada mala. Huu, hataholi luma lae, lanoli la'eneu Lamatuak, tehuu kada ala pepeko ndia. Lanoli lafufunik sila dudu'a manggalau nala sila. Huu ndia de, ala bisa tao sila nanonoli pepeko nala neu hataholi kamahele kala. Mete ma ei mamananene neu sila nanonoli nala, na, dei fo ei makalulutuk henin. Ala lalelesi lae, Lamatuak Yesus ndia, sila lamatuan taa ndia. Naa te, Yesus soi nala sila belin ana seli. Huu sila tatao leondian, de, dei fo sila mesa kasa lakalulutuk lai-lai.

² Mae leondiak boe, tehuu dei fo hataholi no'u kala tungga sala, ma tao ladabak fo taa lameda mae. Dei fo hataholi no'uk lae, nanonoli tetebes ndia, sala, huu mese pepeko kala kedi lala sala.

³ Mese pepeko kala sila, balena'o la. Ala dula mata-mata kala, fo ala bisa pepeko lala ei doi

† **1:20** Dede'a Yunani nai ia bisa ndandaan telu. 1) Mana kokolak esa, kokolak taa tungga ndia hihii-nanau hehelin; 2) taa hambu hataholi esa bisa nalelak basa maksud leme Lamatuak mana kokolan hehelun. 3) mete ma ita nau talelak Lamatuak mana kokolan esa hehelun, na, ndia hihii, taa neme kada ndia hehelu hehelin, tehuu musi nakasasaman no Lamatuak Dede'a-kokolan katematuan.

mala. Ma boso lili henin, huu Manetualain dadi Mana Maketu Dede'ak fo tana sunggu nitak. Neme makahulun mai, Ana nahehele so, fo huku sala. Dei fo ala lakalulutuk heni sala.

⁴ Conto leo, makahulun, Lamatuak ata nusa-sodan luma tao salak. Tehuu Lamatuak dadik neu Mana Maketu Dede'ak, de taa mbo'i heni sala. Ana mbia heni sala leni naraka leu, ma longga sala leu Bolo Makiuk fo Madema. Ala lahani lai mamanak ndia losa fain fo ala lasale Ndia.

⁵ Leondiak boe, no hataholi lele ulu kala. Faik ndia, lasoda tao manggalauk, ma tala mbali Manetualain. Tehuu Lamatuak heti so, fo Ndia hataholi dale ndoon esa, nade Noh, natudu dalak fo hataholi bisa nasoda ndoos. Tehuu, tala nau lamanene neu ndia boe. Huu ndia, de, Lamatuak haitua faa tuak mai, fo tao nakalulutu heni hataholi la fo taa nau mbali Ndia. Tehuu Ana nasala'e nala Noh no ndia bobonggi nala. Sila basa sala hataholi falu.✧

⁶ La'i esa bali, hataholi lele ulu kala malai kota Sodom ma kota Gomora, ala lasoda lo manggalaun ana seli. De, Manetualain huku sala. Ana hotu heni basa hata malai ndia kala dadik afu. Boe ma basa hataholi malai ndia kala mate basa sala. Ndia dadi conto neu hataholi fe'e kala fo mana nau lasoda manggalauk, ma taa mbali Manetualain. Ala bisa bubuluk memak sila ua-nale nala, mete ma tala nau hondak.✧

⁷ Tehuu faik ndia, hambu hataholi esa nade Lot, nasoda ndoos. Ana manggu no hataholi manggalau kala tatao-nono'i lena-lena nala, fo tala nau lamanene neu Lamatuak. Boe ma,

✧ 2:5 Tutuik la'eneu Sososan 6:1—7:24 ✧ 2:6 Tutuik la'eneu Sososan 19:24

Lamatuak nasala'e nala Lot, neme ndia mai.✧
⁸ Lot mesa kana nateme tao ndoos, tehoo, ana leo nai kota sodom hataholi nala lalada nala. De, tungga-tungga faik ndia boe oo, nita ma namanene ala la'olena Lamatuak Heti-heu nala. Ndia tao nala ndia dalen hedis.

⁹ Basa conto la sila latudu, lae, Manetualain bubuluk dalak fo nasala'e nala hataholi mana mahiik namanene neu Ndia, neme soba-douk mata-mata kala. Ndia boe oo, nalelak fee huhuku belak neu hataholi la fo soda nala peko-paki. Ma Ana tao leondiak nakandoo losa fain, fo Ana naketu basa hataholi la dede'a nala. ¹⁰ Huhuku mabela ndia, nakalenak soaneu hataholi fo kada nahiik nasoda manggenggeok, tungga sila hihii-nanau heheli nala. Ala taa nau lamanene neu hataholi esa boe, ma ala haumemee basa hataholi mana to'u koasa la. Neu ko Lamatuak huku sala.

Boe ma, mese masapepeko isinaak sila lambal-ani lalan seli, ma koao. Ala taa nau fee hadak, ma ala taa bii kokolak tao laboboo Manetualain no Ndia ata nusa-soda nala malai lalai. ¹¹ Naa te, Ndia ata nusa-sodan balakain lena heni mese masapepeko kala sila. Mae leondiak boe oo, tehoo ata nusa-soda kala sila taa kokolak tao laboboo mese nala sila nai sila Lamatuan matan. Ma sila boe oo, taa lambue soli salak neu mese nala sila.

¹² Tehoo mese masapepeko kala sila lateme kokolak tao laboboo la'eneu dede'a nusa-soda kala fo sila mesa kasa taa lalala kana. De, sila sama leo banda fo tala dudu'a lalalak! Malolenak, humu nala sala fo tao nakalulutu heni sala! Huu, sila ua-nalen ndia. Neu ko dei

✧ 2:7 Tutuik la'eneu Sososan 19:1-6

fo ala lakalulutuk heni sala, huu sila tatao-nono'i nala. ¹³ Ala tao lakatoto'ak no'uk neu hataholi la. Basa, dei fo Lamatuak boe tao nakatoto'a kasa, huu sila tatao taa ndoos. Ala lahiik kada feta manggalauk no'u. Sila boe oo, lahiik tao ladabak neu leledok, fo suek basa hataholi la bisa lita sila manggalau nala. Sila taa mae lalelak, boe ma ala tao lakalulutu ei nade malole mala. Mete ma la'a feta no'u lo ei, na, kada ala nau tao tungga sila hihii manggalaun. ¹⁴ Mata nala lakabubulak fo sangga inak suek ala nau tao eok no sala. Ala kada lasoda tao manggalauk lakandoo. Ala lahiik sangga hataholi fo namahehelen neu Lamatuak taa matea, boe ma ala fufudin fo tao manggalauk tungga. Ala lambue sangga dalak fo balena'o lakandoo. Neu ko Lamatuak huku sala!☆

¹⁵⁻¹⁶ Makahulun, mese masapepeko kala sila, hataholi mana tungga dala ndoos, tehoo doo-doo, boe ma ala la'o fe'ek leu. No leondiak, ala sama leo Balaam lele uluk, fo ndia Bosor* anan. Ndia ndia, Lamatuak mana kokolan esa. Tehoo ana nahiik nalan seli sangga doik, de ana tao dede'a taa ndoos. La'i esa Balaam sa'e banda keledei. Tungga teteben, na banda keledei la taa bisa lakokola. Tehoo, faik ndia Lamatuak tao banda keledei ndia nakokola leo hataholi! Boe ma banda keledei ndia ka'i Balaam, huu ndia tatao manggalaun. Banda keledei ndia nau fo ana hahae tao dede'a pepekok bali, sama leo

☆ **2:14** Tutuik la'eneu Sososan 6:5 * **2:15-16** Susula dede'a Yunani neulauk nalan seli, nae, Bosor. Hambu susulak luma bali nana sulak, nae, *Beor*. Basa susula dede'a Yunani nana sulak nae, *Balaam*. Susula Malalaok dede'a Indonesia nana sulak nae, *Bileam*.

hataholi kamuluk. ☆

¹⁷ Mese masapepeko kala sila, sama leo oe matak esa fo sosoan taa huu mada heni oen so. Ala sama leo manggasasabuk fo sosoan taa, huu taa neni uda, kada ani fumbu henin. Lamatuak sadia memak mamana makiu mumuuk esa fo nakalee sala. ¹⁸ Huu ala labafa lalan seli, tehoo isin taa. Ala lahiik fufudi hataholi fo bei fo hondak leme sila salan mai, fo suek ala tao seluk salak tungga sila hihii manggalaun bali.

¹⁹ Hataholi masapepeko kala sila helu, lae, “Mete ma ei mamananene ai, na, ei makambo'ik kada tao tungga ei hihii mala!” Tehoo hataholi mana kokolak leondia kala, sama leo ata fo taa bisa nakambo'ik aon neme sila manggalau nala mai. Huu hataholi mana mbo'i salak esa heti ndia, na, ndia sama leo ana dadik salak ndia atan.

²⁰ Mete ma nau makambo'ik muma manggalauk nai daebafok ia, fo mana tao manggenggeo ita, na, ita musi talelak ita Lamatuan Yesus Karistus. Tehoo, mete ma hambu mana heok neme ndia mai, boe ma nanamba'ak seluk no dede'a manggalauk, sama leo makahulun ndia, na, ndia sama leo dede'a manggalauk ndia heti sala. Hatematak ia, ala boe lamabela lalan seli bali. ²¹ Mete ma ala bubuluk dala soda ndoos, tehoo ala heok leme dalak ndia mai, ma ala heok lasadea Manetualain palenda malalaon fo makahulun ala simbok ndia, na ndia taa malole. Dei fo ala simbok huhuku mabela, de malolenak ala taa bubuluk litak Lamatuak dala ndoon ndia.

²² Hambu dede'a lasik fo nae, “Mete ma busa muta, na na'a falik muta hehelin ndia.” Hambu fe'ek bali, nae, “Mae nadiu bafi esa oe so, tehoo

☆ **2:15-16** Lelekek 22:4-35

neu loli seluk tane bali.” Kokolak sila latudu la'eneu mese masapepeko kala sila.✧

3

Ita Lamatuan sangga fali main

¹ Tolanoo susue nggalei! Ia, au susula kaduang fee ei. Nai susula kadua nggala ia, au asanenedak ei, fo ei bisa dudu'a la'eneu dede'a ndoo sala. ² Masaneda Manetualain mana kokola malalaon, kokolan lele uluk ele. Masaneda Yesus nadedenu nala boe. Lamatuak palenda sala, fo suek lafada Ndia kokolan. De, dudu'a neulalau la'eneu hata fo ala lafadan neu ei. Yesus ndia, tao nasoda ei mima ei sala-singgo mala mai!

³ Masaneda leoiak dei: mae daebafok bei ta basan, tehuu hambu mana haumemee kala kada tao ladabak tungga sila hihii-nanau nala. Ala kokolak tao lakalulutu basa dede'a ndoos.✧ ⁴ Ala kokolak lae, “Awe'ek! Yesus helu, nae, Ana sangga fali main do? Mete ma leondiak, na, Ndia nai bee? Huu, mulai neme ita bei-ba'i nala mate sala, losa hatematak ia boe oo, taa hambu mana dadik leondiak. Basan la'ok nahele nakandoo, mulai neme Lamatuak nakadadadik lalai ma daebafok.”

⁵⁻⁷ Tehuu, hambu dede'ak esa, fo hataholi masapepeko kala sila taa nau lasanedan. Fo ndia, neme sososan mai kada Lamatuak kokolak, boe ma lalai dadi memak. Boe ma Lamatuak nakadadadik oe. Basa de Ana tao kofe'e oe neme madak lain mai, boe ma madak lain sadu neme oe dale mai. Lamatuak kokolak leobeek so, na, ndia dadi memak.✧ Doo-doo,

✧ 2:22 Dede'a Lasik 26:11 ✧ 3:3 Yudas 1:18 ✧ 3:5-7 Tutuik la'eneu Sososan 1:6-9

boe ma Lamatuak pake faa, fo tao nakalulutu heni basa hataholi malai daebafok ia, fo neu lelek Noh nasoda ndia.✧ Tehuu hatematak ia, Lamatuak nafada memak fo Ana sangga tao hata neu lalai ma daebafok. Hatematak ia Ana bei nakatataak, tehUU dei fo nandaa no ndia fain, Ana sangga hotu heni sala. Huu dei fo Lamatuak fee huhukuk, fo tao nakalulutu heni hataholi fo taa mana nau mbali Ndia. Mae leondiak, tehUU hataholi masapepeko kala sila, taa nau lasaneda lae, neu ko Manetualain tao tungga hata fo Ana kokolan ndia so.

⁸ Tolanoo susue nggalei! Boso mafalende heni dede'ak ia. Ita Lamatuan, taa hinga faik sama leo ita. Huu tungga Ndia, na, faik esa sama leo teuk lifun esa. Ma teuk lifun esa, sama leo kada faik esa boe.✧ ⁹ Mete ma Lamatuak helu tao hata esa, na neu ko Ana taon. Mete ma fain nandaa, bei fo Ana taon. Hambu hataholi luma dudu'a lae, "Manetualain tao ues ngge'an seli." Naa te taa! Ndia nggaleloan fo fee lelak soaneu basa hataholi hondak ma fali leni Ndia leu. Huu Ana taa nau fo hataholi esa boe laelak dook lo Ndia.

¹⁰ Tehuu dei fo mete ma ita Lamatuan fafali main ndia, taa hambu hataholi bubuluk mema kana. Huu, Ndia mamain ndia, kada nggengge neuk, sama leo na'o esa maso neni uma dale neu. Faik ndia, basa hata malai lalai, ha'i na'a heni sala, sama leo ledo, bulak, ma nduu kala. Basan basa sala! Leondiak boe, daebafok no basa isi nala. Kade heni sala!✧

✧ **3:5-7** Tutuik la'eneu Sososan 7:11 ✧ **3:8** Sosoda Koa-kio kala 90:5 ✧ **3:10** Mateos 24:43; Lukas 12:39; 1 Tesalonika 5:2; Dae-bafok Mata Beuk 16:15

¹¹ De, mete ma dei fo ha'i na'a heni basa sala leondiak, na, ei musi dadik neu hataholi matak leobeek? Ei musi mbalak eik, fo masoda tungga Lamatuak hihii-nanaun. Ei musi masoda malalaok! ¹² Ei boe oo, mahani mbea-mbea Lamatuak mamain. De, ei musi mbalak eik, fo tao faik ndia mai lai-lai. Faik ndia boe, ha'i na'a heni lalai. Ma basa hata malai lalai ha'i na'a sala, de noe heni sala.

¹³ Tehuu, dei fo hambu lalai mata beuk ma daebafo mata beuk. Manetualain helu leondiak so, boe ma ndia fo ita tahani mbea-mbea. Nai ndia, kada hambu hataholi soda ndoo sala.✧

¹⁴ De, tolanoo susue nggalei! Ledoeik fo ei mambue mahani dede'a kala ia, ei musi mbalak eik, fo dadik hataholi malole tungga Lamatuak hihii-nanaun. No leondiak, na, taa hambu hataholi bisa soli salak neu ei. Mbalak eik fo masoda mole boe.

^{15a} Huu ita Lamatuan ndia, kada nggaleloan, suek Ana bisa nasala'e nala ei mima ei sala-singgo mala mai.

Petrus nate'e ndia susulan

^{15b} Ita tolanoon Paulus sulak fee ei so, la'eneu dede'a no'u kala fo sama leo manai au susulang ia. Lamatuak ndia feen ana bubuluk leondiak, huu ndia de, ana sulak leondiak. ¹⁶ La'i-la'ik Paulus sulak susulak, na, ndia boe oo kokolak dede'a kala ia. Neme ndia susula nala mai, memak hambu dede'ak fo ita taa du'a la'e ndia hihiiin. Hambu hataholi boe tao naeok Paulus hihiiin. Sila boe oo, tao laeok dede'a fe'e kala lai Lamatuak Susula Malalaon. Sila ndia, na

✧ **3:13** Yesaya 65:17; 66:22; Dae-bafok Mata Beuk 21:1

ndia mbelatua, ma hataholi la fo namahehelen taa matea. Hataholi mata leondia kala, dei fo lakalulutuk heni sala.

¹⁷ Tolanoo susue nggalei! Ei bubuluk mese masapepeko kala sila dala soda nala. De, mata neuk bou! Huu tala nau lamanene heti-heuk esa boe. Ala soba-soba fo pepeko ei, fo suek ei heok mima dala ndoos mai. Tehuu boso mbo'i sala senggai ei leondiak. Huu, ei musi mahele mini tean. ¹⁸ Malolenak, ei namahehele mala moli lakandoo. Huu ei bubuluk ita Lamatuan Yesus Karistus so, fo nasala'e nala ita teme ita sala-singgo nala mai. Ana nau natudu Ndia dale malolen neu ei. Ma Ndia boe oo, nau ei malelak neulalau Ndia bali.

Au nau fo basa hataholi so'u dema-demak Ndia, neme hatematak ia mai, losa dodoon neu!*

Soda-molek,
Petrus

* **3:18** Susula dede'a Yunani luma tamba "Amin" nai ia.

**Rote Lole Alkitab
Genesis and the New Testament in the Rote Lole
language of Indonesia**

copyright © 2004 Unit Bahasa dan Budaya

Language: Rote Lole (Lole)

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-28

PDF generated using Haiola and XeLaTeX on 11 Nov 2022 from source files dated 9 Oct 2020

66fb93de-30be-533a-80d6-f3d0582cedf6